

Ir sin patinas e tuttina spargnar

vul optimar il consum d'energia e buca desister dall'infrastructura turistica relevanta.

Per prevegnir ad ina munconza d'energia ha la suprastanza communal da Mustér analisau da rudien co la vischnaunca sa sezza spargnar d'energia. Sco ella ha communicau als mieds da massa, duei da principi buca vegnir desistiu da purschidas turisticas relevantas, mobein vegnir optimau il consum d'energia leu, nua ch'ei fa senn ed ei cunvegnent.

Illuminaziun reducida

Tier l'infrastructura turistica vul la vischnaunca da Mustér cunzun mantener quest unviern il glatsch artificial el Center Fontauna sco era la loipa da cuorsa liunga a Fontanivas. La grossezia dil glatsch vegn minimada aschi fetg sco pusseivel e la patinera vegn gia serrada sil pli tard la fin da fevrer 2023. Durent dis pli caulds ni da favugn vegn la patinera aviarta pli tard. Neiv tecnica vegn buca producida sin reserva ed ei vegn ennevau mo la runda principala a Fontanivas. Plinavon vegn l'illuminaziun da Nadal reducida sin in minimum e stizzada naven dallas 22.00. L'illuminaziun da Nadal ella vischnaunca da Mustér vegn ad arder mo entochen dumengia, ils 8 da schaner 2023. «Era la fermezia dall'illuminaziun publica vegn reducida aschi fetg sco igl ei aunc responsabel», scriva la suprastanza communal als mieds da massa. Ulteriuramein seigien mesiras generalas pli pintgas previdas en mintga sector dalla vischnaunca.

Preparativas pil seracass

La vischnaunca da Mustér ei cunscenta da sia responsabladad ed ei lundervi da far las preparativas necessarias per in eventual seracass pli grond. Cunquei vul la suprastanza communal era sensibilisar ed animar mintga vischina e mintga vischin da spargnar energia leu nua ch'igl ei pusseivel e fa senn; per exempel tschentiar giu la notg apparats electronics, reducir tscheu ni leu empau la glisch ni far la duscha enstagl da far bogn. «Mintgin sa optimar in tec il consum d'energia el senn che daguot e daguot fan puoz», scriva la suprastanza communal da Mustér essend perschuada da quei agir e giavischond in bi temps d'advent. (cdm/fmr)